

delegacións provinciais, no artigo 10 do Decreto 213/1998, do 10 de xullo, polo que se establece a estrutura orgánica da Consellería de Educación e Ordenación Universitaria.

Artigo 4º

Modifícase o artigo 11 do Decreto 213/1998, do 10 de xullo, polo que se establece a estrutura orgánica da Consellería de Educación e de Ordenación Universitaria, que queda redactado como segue:

Son órganos colexiados da Consellería de Educación e Ordenación Universitaria os seguintes:

1. O Consello Escolar de Galicia, creado pola Lei 3/1986, do 18 de decembro.
2. O Consello Universitario de Galicia, creado pola Lei 5/1987, do 27 de maio, e modificado pola Lei 11/1989, do 20 de xullo.
3. O Consello Galego de Educación e Promoción de Adultos, creado pola Lei 9/1992, do 24 de xullo.
4. O Consello Galego de Formación Profesional, creado polo Decreto 110/1999, do 8 de abril.
5. A Comisión Asesora de Formación do Profesorado, creada polo Decreto 245/1999, do 29 de xullo.

Artigo 5º

Modifícase a disposición adicional única do Decreto 213/1998, do 10 de xullo, polo que se establece a estrutura orgánica da Consellería de Educación e Ordenación Universitaria, que queda redactado como segue:

Disposición adicional

Primeira.-As competencias que este decreto lles atribúe ós órganos desta consellería, en materia informática, entenderanse sen prexuízo das atribuídas ó Instituto Galego de Estatística, e exerceranse consonte as directrices previstas nas leis reguladoras da estatística e no Plan Galego de Estatística.

Segunda.-Os órganos da Consellería de Educación e Ordenación Universitaria que se citan no Decreto 268/2000, do 2 de novembro, polo que se crea o Museo Pedagóxico de Galicia, desempeñarán as correspondentes competencias e funcións nos termos que nel se establecen.

Disposición derradeira

Única.-Este decreto entrará en vigor o mesmo día da súa publicación no Diario Oficial de Galicia.

Santiago de Compostela, vinteun de decembro de dous mil.

Manuel Fraga Iribarne
Presidente

Celso Currás Fernández
Conselleiro de Educación e Ordenación Universitaria

CONSELLERÍA DE MEDIO AMBIENTE

Decreto 298/2000, do 7 de decembro, polo que se regula a autorización e notificación de produtor e xestor de residuos de Galicia e se crea o Rexistro Xeral de Produtores e Xestores de Residuos de Galicia.

A Lei 10/1998, do 21 de abril, de residuos, asumiu os principios establecidos pola Unión Europea en política de residuos, consistente en abandona-la clasificación en dúas únicas modalidades (xeral e perigosos) e establecer unha norma común para todos eles, que poderá ser completada cunha regulación específica para determinadas categorías de residuos.

Desta forma, a lei aplícase a todo tipo de residuos e, no que á forma de intervención administrativa destas actividades se refire, somete a réxime de autorización polo órgano competente da Comunidade Autónoma, tódalas actividades de valorización e eliminación de todo tipo de residuos, e ademais para os residuos perigosos, as de recollida, almacenamento e transporte, cando se realice asumindo o transportista a titularidade do residuo. A realización do resto de actividades está sometida a réxime de notificación previa á Administración autonómica ambiental, que deberá rexistrar debidamente estas actividades, e iso sen prexuízo de que as comunidades autónomas sometan estas actividades a réxime de autorización.

En Galicia, o Decreto 260/1998, do 10 de setembro, regula a autorización de xestor de residuos sólidos urbanos e a inscrición no Rexistro Xeral de Residuos Sólidos Urbanos de Galicia, e o Decreto 263/1998, do 10 de setembro, regula a autorización e crea o Rexistro de Produtores e Xestores de Residuos Perigosos; sen embargo, non existe unha norma que regule a autorización e rexistro de residuos distintos ós perigosos e ós urbanos ou municipais.

Non son obxecto deste decreto os residuos sanitarios regulados polo Decreto 460/1997, do 21 de novembro, polo que se establece a normativa para a xestión dos residuos dos establecementos sanitarios na Comunidade Autónoma de Galicia

Sendo evidente a necesidade de regula-lo réxime de autorizacións para todo tipo de residuos, optouse pola regulación de forma xenérica para as actividades de produción e xestión de residuos, aínda que considerando as posibles especificidades duns e outros. Os argumentos a favor desta opción pódense resumir en:

a) Razóns de acomodación á tendencia normativa da UE, que recolle as regulacións dos residuos en normas xerais comúns a todo tipo de residuos, completada coas regulacións específicas para determinados tipos de residuos. Xa vimos como a Lei básica de residuos asume esta tendencia aplicándose a todo tipo de residuos, coas excepcións recollidas nela.

b) Motivos de simplificación normativa. Posibilita a existencia dun instrumento xurídico único que evi-

te a ineludible peregrinación por distintas normas, tanto ó cidadán, que ten que acudir a varios instrumentos xurídicos se quere coñecer cáles son os requisitos normativos de aplicación á súa situación, cando ademais en ocasións xestiona residuos de variada tipoloxía, como ós responsables de tramita-los expedientes, que se encontran coa mesma dificultade.

c) Razóns orientadas a homoxeneizar e simplifica-lo réxime administrativo existente.

d) A precisión dalgúns aspectos da normativa actual, réxime de inscrición das actividades, se son de oficio ou por instancia de parte, declaración de orixe e destino ós xestores intermedios.

e) Motivos para crear un rexistro único de actividades de residuos que facilite adecuadamente a súa xestión e permita extraer de forma eficaz e áxil datos conxuntos válidos para todo tipo de residuos.

As principais modificacións introducidas no decreto son:

-Regúlanse os requisitos necesarios para outorga-las autorizacións de construción de instalacións de xestión de residuos urbanos, previstas na Lei 10/1997, do 22 de agosto, de residuos sólidos urbanos de Galicia.

-Ós requisitos actuais para seren autorizados a realiza-las actividades sometidas a este réxime engádense:

a) A declaración de destino de residuos, que deberá estar acreditada debidamente.

b) A esixencia dun estudio ambiental quedando sometido o proxecto á declaración de efectos ambientais para tódolos proxectos de eliminación e algúns de valorización, e para as autorizacións de construción de instalacións sometidas a autorización. Isto sen prexuízo, como xa se indicou, de seguir coa mesma figura de protección ambiental para as actividades de eliminación de residuos perigosos prevista no Decreto 442/1990, do 13 de setembro, de avaliación de impacto ambiental.

-Establécense os criterios de fixación da contía do seguro: cantidade e tipo de residuo, actividade de xestión e ámbito territorial.

-Regúlase o contido mínimo das autorizacións e das notificacións de inscrición.

-Créase o Rexistro Xeral de Produtores e Xestores de Residuos de Galicia no que serán inscritos de oficio pola Administración as persoas físicas ou xurídicas que realicen calquera das operacións de produción ou de xestión de residuos reguladas neste decreto.

-Por último, ós datos que actualmente deben constar coa preceptiva notificación de actividade engádense:

a) A declaración de destino de residuos, xunto con xustificante suficiente.

b) A esixencia da presentación dunha póliza de seguro da empresa transportista suficiente para cubri-los riscos da actividade.

Este decreto estrutúrase en sete capítulos.

No capítulo I establécense as normas xerais en materia de produción e xestión de residuos.

O capítulo II regula o réxime xurídico das actividades de produción e xestión de residuos sometidas a autorización administrativa e regula igualmente as autorizacións para a construción de instalacións de residuos sólidos urbanos, en cumprimento do establecido no artigo 15 da Lei 10/1997, do 22 de agosto, de residuos sólidos urbanos de Galicia.

A regulación do réxime de notificacións para aquelas actividades de xestión que non estean sometidas a réxime de autorización administrativa regúlase no capítulo III, sometendo estas actividades a unha intervención administrativa máis lixeira.

O capítulo IV refírese á interposición do recurso de alzada.

As obrigas establécense no capítulo V, distinguindo entre as obrigas daqueles produtores e xestores que realizan actividades de xestión sometidas a autorización administrativa e as daqueles que só están obrigados a notifica-la realización da actividade de xestión.

No capítulo VI créase o Rexistro Xeral de Produtores e Xestores de Residuos de Galicia, no que serán inscritos de oficio pola Administración as persoas físicas ou xurídicas que realicen calquera das operacións de produción ou de xestión de residuos reguladas neste decreto. O rexistro estrutúrase en dúas seccións denominadas «Dos residuos perigosos» e «Dos residuos non perigosos». Na sección referente ós residuos perigosos inscribíranse as persoas físicas ou xurídicas titulares de instalacións de produción e xestores de residuos que se consideren perigosos de acordo coa definición do artigo 2º deste decreto, e na referente ós non perigosos inscribíranse separadamente as actividades de xestión correspondentes ós residuos urbanos e municipais, ós sanitarios, ós industriais e ós agrarios.

Por último, o capítulo VII está dedicado á potestade sancionadora da Administración. A potestade para a incoación e instrución dos procedementos sancionadores corresponderalle ó director xeral de Calidade e Avaliación Ambiental e a resolución dos expedientes será competencia deste no tocante ás infraccións leves, do conselleiro de Medio Ambiente no caso de infraccións graves e, finalmente, do Consello da Xunta de Galicia no suposto de infraccións moi graves.

O Decreto 482/1997, do 26 de decembro, polo que se establece a estrutura orgánica da Consellería de Medio Ambiente, atribúelle a esta consellería a competencia e funcións en materia de residuos.

Este decreto, respectando a regulación establecida na normativa básica estatal e de acordo coa posibilidade de establecer normas adicionais de protección que lle atribúe á Comunidade Autónoma de Galicia a Constitución e mailo seu Estatuto de autonomía, así como o artigo 21.2º e 3º da Lei básica do 21 de abril, de residuos, completa certos aspectos do procedemento e autorizacións de produtores e xestores de residuos e crea o Rexistro Xeral de Produtores e Xestores de Residuos de Galicia.

Na súa virtude, por proposta do conselleiro de Medio Ambiente, de acordo co dictame do Consello Consultivo de Galicia e logo de deliberación do Consello da Xunta de Galicia na súa reunión do día sete de decembro de dous mil,

DISPOÑO:

Capítulo I Disposicións xerais

Artigo 1º.-Obxecto do decreto.

Este decreto ten por obxecto regula-las autorizacións e notificacións de produtores e xestores de residuos de Galicia e crea-lo Rexistro Xeral de Produtores e Xestores de Residuos de Galicia.

Deberán solicita-la autorización como produtores ou xestores de residuos as persoas físicas ou xurídicas que realicen as actividades relacionadas no artigo 4º, e estarán suxeitas ó réxime de notificación as persoas físicas ou xurídicas que realicen as actividades de produción ou xestión relacionadas no artigo 14º deste decreto.

Artigo 2º.-Definicións.

Para os efectos deste decreto entenderase por:

A) Residuo: calquera substancia ou obxecto pertencente a algunha das categorías que figuran no anexo da Lei 10/1998, do 21 de abril, de residuos, do cal o seu posuidor se desprenda ou do que teña a intención ou a obriga de desprenderse. En todo caso, terán esta consideración os que figuren no Catálogo Europeo de Residuos (CER), aprobado polas institucións comunitarias.

B) Residuos urbanos ou municipais: os xerados nos domicilios particulares, comercios, oficinas e servicios, así como todos aqueles que non teñan a cualificación de perigosos e que pola súa natureza ou composición poidan asimilarse ós producidos nos anteriores lugares ou actividades.

Terán tamén a consideración de residuos urbanos os seguintes:

Residuos procedentes da limpeza de vías públicas, zonas verdes, áreas recreativas e praias.

Animais domésticos mortos, así como os mobles, obxectos e vehículos abandonados.

Residuos e entullos procedentes de obras menores de construción e reparación domiciliaria.

C) Residuos perigosos: aqueles que figuren na lista de residuos perigosos, aprobada no Real decreto 952/1997, así como os recipientes ou envases que os contiveron. Os que estean cualificados como perigosos no Catálogo de Residuos de Galicia, pola normativa comunitaria e os que poida aproba-lo Goberno de conformidade co establecido na normativa europea ou en convenios internacionais dos que España sexa parte.

D) Productor: calquera persoa física ou xurídica que pola súa actividade, excluída a do consumo doméstico, produza residuos ou efectúe operacións de tratamento previo, de mestura ou doutro tipo que ocasionen un cambio de natureza ou de composición deses residuos. Terá tamén carácter de produtor o importador de residuos ou adquirente en calquera Estado membro da Unión Europea.

E) Posuidor: o produtor dos residuos ou a persoa física ou xurídica que os teña no seu poder e que non teña a condición de xestor de residuos.

F) Xestor: a persoa ou entidade, pública ou privada, que realice calquera das operacións que compoñen a xestión dos residuos, sexa ou non o produtor deles.

G) Xestión: a recolla, o almacenamento, o transporte, a valorización e a eliminación dos residuos, incluída a vixilancia destas actividades, así como a vixilancia dos lugares de depósito ou vertedura despois do seu peche.

H) Valorización: todo procedemento que permita o aproveitamento dos recursos contidos nos residuos sen pór en perigo a saúde humana e sen utilizar métodos que poidan causar prexuízos ó ambiente. En todo caso, estarán incluídos neste concepto os procedementos enumerados no anexo II.B da Decisión da Comisión (96/350/CE) do 24 de maio de 1996, así como os que figuren nunha lista que, se é o caso, aprrobe o Goberno ou a Comunidade Autónoma de Galicia.

I) Eliminación: todo procedemento dirixido, ben á vertedura dos residuos ou ben á súa destrución, total ou parcial, realizado sen pór en perigo a saúde humana e sen utilizar métodos que poidan causar prexuízos ó ambiente. En todo caso, estarán incluídos neste concepto os procedementos enumerados no anexo II.A da Decisión da Comisión (96/350/CE) do 24 de maio de 1996, así como os que figuren nunha lista que, se é o caso, aprrobe o Goberno ou a Comunidade Autónoma de Galicia.

J) Recolla: toda operación consistente en recoller, clasificar, agrupar ou preparar residuos para o seu transporte.

K) Almacenamento: o depósito temporal de residuos, con carácter previo á súa valorización ou eliminación, por tempo inferior a dous anos ou a seis meses se se trata de residuos perigosos, a menos que regulamentariamente se establezan prazos inferiores.

Non se inclúe neste concepto o depósito temporal de residuos nas instalacións de produción cos mesmos fins e por períodos de tempo inferiores ós sinalados no parágrafo anterior.

L) Vertedoiro: instalación de eliminación que se destine ó depósito de residuos na superficie ou baixo terra.

Artigo 3º.-Dos residuos sanitarios.

Quedan excluídos deste decreto, os residuos sanitarios regulados polo Decreto 460/1997, do 21 de novembro, polo que se establece a normativa para a xestión dos residuos dos establecementos sanitarios na Comunidade Autónoma de Galicia.

Capítulo II

Das autorizacións de actividades de produción e xestión de residuos

Artigo 4º.-Da autorización administrativa de produtor e xestor de residuos.

Someteranse ó réxime de autorización como produtores ou xestores, pola Dirección Xeral de Calidade e Avaliación Ambiental, as persoas físicas ou xurídicas que realicen as actividades seguintes:

1. Actividades de produción:

a) A construción de instalacións de xestión de residuos urbanos ou municipais que estará supe-ditada ó previsto no Plan de Xestión de Residuos Sólidos Urbanos de Galicia.

b) A instalación, ampliación, modificación substancial ou traslado de industrias ou actividades produtoras de residuos perigosos.

c) A instalación de industrias ou actividades xeradoras ou importadoras de produtos que polo seu uso poderán dar lugar a residuos perigosos.

2. Actividades de xestión:

a) Recolla e almacenamento de residuos perigosos, así como o seu transporte cando se realice asumindo o transportista a titularidade do residuo.

b) Recolla, almacenamento e transporte de residuos urbanos ou municipais.

c) Valorización e eliminación de residuos.

d) Considerará actividades de xestión de residuos, as realizadas:

1) Polos produtores respecto dos seus propios residuos perigosos, cando realicen actividades de xestión destes residuos.

2) Polos produtores cando realicen operacións de xestión con residuos perigosos procedentes doutros produtores ou xestores.

Artigo 5º.-Actividades realizadas por entidades societarias.

As actividades realizadas por entidades societarias requirirán autorización administrativa ou, de se-lo caso, rexistro administrativo, independentes dos que puidesen te-los socios que a forman.

Artigo 6º.-Dos xestores por imperativo legal de residuos urbanos ou municipais.

1. As entidades locais que realicen a xestión dos residuos urbanos directamente non estarán obrigadas a solicita-la autorización administrativa para a realización das actividades de xestión de residuos urbanos ou municipais.

2. En virtude do disposto no artigo 29 da Lei 10/1997, do 22 de agosto, de residuos sólidos urbanos de Galicia, a Sociedade Galega de Medio Ambiente (Sogama), cando realice a xestión de residuos encomendada no dito artigo directamente, non estará obrigada a solicita-la autorización administrativa.

Artigo 7º.-Figuras de protección ambiental.

1. Avaliación do impacto ambiental. O proxecto para a realización das actividades de eliminación de residuos perigosos indicadas no anexo XII deste decreto, estará sometido a declaración do impacto ambiental.

2. Avaliación de efectos ambientais. O proxecto para a realización de actividades de valorización de todo tipo de residuos e de eliminación de residuos non perigosos indicadas no anexo XII, así coma para a construción de instalacións de residuos urbanos ou municipais, estará sometido á declaración de efectos ambientais.

Artigo 8º.-Solicitude das autorizacións.

1. Deberán solicita-la autorización administrativa previa as persoas físicas ou xurídicas que realicen as actividades sinaladas no artigo 4º, quedando, unha vez autorizadas, debidamente inscritas no Rexistro Xeral de Produtores e Xestores de Residuos de Galicia.

2. A solicitude dirixirase á Dirección Xeral de Calidade e Avaliación Ambiental, segundo o modelo que se establece nos anexos I, II, III, IV,V,VI,VIII e IX deste decreto.

3. A solicitude presentarse nas oficinas da Dirección Xeral de Calidade e Avaliación Ambiental, ou en calquera das delegacións provinciais da Consellería de Medio Ambiente, sen prexuízo da facultade que lles outorga ós particulares o artigo 38.4º da Lei 30/1992, do 26 de novembro, de réxime xurídico das administracións públicas e do procedemento administrativo común.

Artigo 9º.-Documentación.

A solicitude presentarse xunto coa seguinte documentación acreditativa:

1. Para actividades de produción.

-De residuos urbanos ou municipais: (anexos I e II).

A. Cando se trate dun xestor institucional:

a) Solicitude das entidades locais xunto coa documentación sinalada na letra f) do parágrafo 2 deste artigo.

b) Proxecto técnico da instalación, visado polo colexio oficial competente, que se axuste ás prescricións do anexo X, parágrafo A. 1, deste decreto, ou certificado de idoneidade expedido polo técnico municipal competente, no soposto dos entes locais.

c) Estudio ambiental, quedando sometido o proxecto á declaración de efectos ambientais.

B. Cando se trate dun xestor non institucional:

a) A documentación sinalada as letras a), c) e f) do parágrafo 2 deste artigo.

b) Proxecto técnico da instalación, visado polo colexio oficial competente, que se axuste ás prescricións do anexo X, parágrafo A.1, deste decreto.

c) Estudio ambiental, quedando sometido o proxecto á declaración de efectos ambientais.

-De residuos perigosos: (anexos III, IV, V, VI, VII).

Deberán presentar, ademais da documentación que se esixe para tódalas actividades de xestión sinaladas no parágrafo 2 deste artigo:

Un estudio co contido do anexo VII deste decreto.

2. Para actividades de xestión.

-Documentación xeral para tódalas actividades:

a) Copia compulsada do código de identificación fiscal (CIF) da empresa ou, se é o caso, documento nacional de identidade (DNI) e número de identificación fiscal (NIF) do empresario individual.

b) En caso de persoa xurídica deberase presentar copia da escritura de constitución ou modificación da sociedade, acreditada por calquera dos medios esixidos en dereito.

c) Poder notarial do representante legal da empresa.

d) Declaración das actividades de xestión ou produción que se van realizar.

e) Datos relativos ó centro ou centros de traballos que se vaia realiza-la actividade: denominación, domicilio, municipio, provincia, teléfono e fax.

f) Declaración do tipo de residuo e cantidade anual que vai producir ou xestionar segundo o Catálogo Europeo de Residuos (CER) e o Real decreto 952/1997, do 20 de xullo, para o caso de residuos perigosos.

g) Declaración da zona de cobertura ou área territorial á que se circunscribe a actividade.

h) Destino dos residuos, constatado a través do certificado correspondente do xestor receptor.

-Para as actividades de recolla e almacenamento de residuos perigosos, así como o seu transporte, cando se realice asumindo o transportista a titularidade do residuo: (anexos VIII e IX).

Deberán presentar, ademais da documentación xeral para tódalas actividades de xestión:

a) Unha memoria descritiva da actividade.

b) Para o caso de transporte:

1) Certificado de formación profesional segundo o modelo oficial (ADR) para cada conductor.

2) ADR do vehículo ou certificado de adecuación deste.

3) Tarxeta de transporte.

4) Póliza de seguro en vigor para cada vehículo.

-Para as actividades de recolla, transporte e almacenamento de residuos urbanos ou municipais.

Deberán presentar, ademais da documentación xeral para tódalas actividades:

a) Memoria descritiva da actividade.

b) Póliza de seguro da empresa transportista suficiente para cubri-los riscos da actividade. A póliza do seguro deberá cubri-los riscos de indemnización polos posibles danos causados a terceiras persoas ou ás súas cousas derivadas do exercicio da actividade, así como os custos de reparación e recuperación do ambiente alterado.

c) Tarxeta de transporte.

-Para as actividades de valorización e eliminación de residuos:

Deberán presentar, ademais da documentación xeral para tódalas actividades de xestión:

A. Cando se trate de residuos non perigosos: (anexos VIII, IX, X, XI, XII e XIII).

a) Un proxecto visado polo colexio oficial competente que se axuste ó contido do anexo X A e que conteña as especificacións do anexo XI para as actividades de xestión de vertedoiro.

b) Un estudio ambiental, quedando sometido o proxecto á declaración de efectos ambientais para as actividades de eliminación e para as de valorización relacionadas no anexo XII.

c) Documento de síntese, para o caso de actividades de eliminación en vertedoiro, que se axuste ó contido do anexo XIII.

B. Cando se trate de residuos perigosos: (anexos VIII, IX, X, XI, XII e XIII).

Un estudio nos termos que se establecen no anexo X B.

Artigo 10º.-Outorgamento da autorización.

1. As autorizacións, que se poderán outorgar para unha ou varias das operacións que se van realizar, se concederán:

a) Logo de comproba-las instalacións nas que se vaia desenvolve-la actividade obxecto de autorización. Poderase prescindir desta comprobación cando se trate de autoriza-la realización de actividades de xestión de residuos urbanos ou municipais consistentes na recolla, transporte e almacenamento.

b) Unha vez presentada a fianza, excepto para a construción de instalación de residuos urbanos ou municipais, e para os produtores de residuos peri-

gosos na forma establecida no Decreto 455/1996, do 7 de novembro, de fianzas en materia ambiental, en contía suficiente para responder dos posibles danos que se lle poidan causar ó ambiente e do seu custo de restauración; así mesmo, a fianza debe garanti-lo cumprimento de tódalas obrigas que fronte á Administración se deriven do exercicio da actividade obxecto de autorización.

No suposto de non existiren factores que permitan determina-la contía da fianza, para os efectos indicados, o importe será o 10 por 100 do orzamento das obras proxectadas para a instalación de depósitos de seguridade, o 5 por 100 do orzamento das obras proxectadas para o resto das instalacións de xestión de residuos e o 5 por 100 do investimento orzado ou do investimento destinado a material para a realización da actividade, cando non exista obra civil.

c) Logo da constitución polo solicitante, excepto para a construción de instalacións de residuos urbanos ou municipais, dun seguro de responsabilidade civil que cubra o risco de indemnización polos posibles danos causados a terceiras persoas ou ás súas cousas, derivado do exercicio das actividades obxecto da citada autorización administrativa. En todo caso, o seguro deberá cubrir:

a) As indemnizacións debidas por morte, lesións ou enfermidades das persoas.

b) As indemnizacións debidas por danos ás cousas.

c) Os custos de reparación e recuperación do ambiente alterado.

A contía da suma asegurada da póliza do seguro de responsabilidade civil fixarase tendo en conta a cantidade e o tipo de residuo que se vaia xestionar ou producir, a actividade de xestión que se vaia realizar, o ámbito territorial no que se vaia desenvolver a actividade de xestión, a localización das instalacións de produción e as súas características técnicas ou outras circunstancias similares.

2. Revisada a documentación achegada, o director xeral de Calidade e Avaliación Ambiental outorgará a autorización ou, se é o caso, procederá á súa denegación mediante resolución motivada.

Artigo 11º.-Contido da autorización.

A autorización conterà, como mínimo, as seguintes especificacións:

a) O lugar da instalación, cando se trate de residuos sólidos urbanos.

b) Que a autorización se outorgará sen prexuízo das demais autorizacións ou licencias esixidas por esta ou outras disposicións, para o caso de instalacións de xestión de residuos urbanos ou municipais.

c) O número de produtor ou xestor de residuos autorizado.

d) O prazo polo que se outorga a autorización, cando se trate de xestores de residuos e produtores de residuos perigosos.

e) A especificación de que a autorización se condicionará ó cumprimento das esixencias establecidas na lexislación de protección civil, cando se trate de produción ou xestión de residuos perigosos.

f) A obriga de cumpri-las prescricións técnicas establecidas no proxecto ou na memoria descritiva da actividade que se presentasen.

g) A necesidade de cumpri-las obrigas que se establecen na Lei 10/1998, do 21 de abril, de residuos, así como de cumprir igualmente, cando se trate de residuos perigosos, as obrigas establecidas no Real decreto 833/1988, do 20 de xullo, polo que se aproba o regulamento para a execución da Lei 20/1986, básica de residuos tóxicos e perigosos, no Real decreto 952/1997, do 20 de xuño, e demais lexislación que en cada momento lle sexa de aplicación.

h) A contía da fianza cando se trate de xestores de residuos.

i) A contía da póliza de seguro de responsabilidade civil fixada. Para o caso de residuos perigosos especificarase o deber de actualiza-la póliza conforme o artigo 6 do Real decreto 833/1988, do 20 de xullo.

j) A cantidade máxima por unidade de produción de residuos que se poden xerar, cando se trate de produtores de residuos perigosos.

k) As características dos residuos que se poden xerar, cando se trate de produtores de residuos perigosos.

l) Os tipos e cantidades de residuos, cando se trate de xestores que realicen actividades de eliminación de residuos.

m) Lugar onde se vaian realiza-las actividades de eliminación.

n) Método de eliminación que se vai empregar.

o) A obriga de adopta-las precaucións en materia de seguridade esixidas pola lexislación aplicable vixente cando se trate de xestores que realicen actividades de recolla, almacenamento, valorización ou eliminación de residuos perigosos.

p) Consecuencias do incumprimento da autorización.

Artigo 12º.-Vixencia e caducidade das autorizacións.

1. As autorizacións de xestores de residuos outorgaranse por un período de cinco anos, susceptibles de dúas prórrogas sucesivas doutros cinco anos cada unha, despois de informe favorable da Subdirección Xeral de Calidade Ambiental, sempre que non se modifiquen as condicións que motivaron a autorización. As devantidas prórrogas deberán ser solicitadas polo titular da autorización con, alomenos, tres meses de antelación á data en que expire a autorización vixente.

2. Transcorridos quince anos desde a autorización inicial, a autorización caducará, e o titular poderá solicitar, con anticipación suficiente, unha nova

autorización, de acordo co procedemento regulado neste decreto.

Artigo 13º.-Da transmisión das autorizacións.

A transmisión das autorizacións reguladas neste capítulo estará suxeita á comprobación previa de que as actividades e as instalacións en que aquelas se realizan cumpren co regulado neste decreto.

Capítulo III

Das notificacións de actividades de produción e xestión de residuos

Artigo 14º.-Actividades suxeitas a réxime de notificación.

Estarán suxeitas ó réxime de notificación á Dirección Xeral de Calidade e Avaliación Ambiental, quedando debidamente rexistradas, as persoas físicas ou xurídicas que realicen as seguintes actividades:

a) Pequena produción de residuos perigosos (anexos IX e XIV).

b) Aquelas nas que se desenvolvan operacións de xestión de residuos non perigosos distintas da valorización ou eliminación e que non teñen a consideración de residuos urbanos ou municipais (anexos IX e XIV).

c) Transporte de residuos perigosos actuando como simples intermediarios por conta de terceiros (anexos IX e XIV).

d) Actuacións en relación cos aceites usados que se leven a cabo nos talleres, estacións de engraxamento e garaxes (anexos IX e XIV).

Os titulares dos talleres, estacións de engraxamento ou garaxes deberán cumprilas obrigas establecidas no Real decreto 833/1988, do 20 de xullo, artigo 13, parágrafos a) e b) e artigo 14, parágrafos 1, 2, 3, e 6, as do Real decreto 952/1997, do 20 de xuño, que modifica aquel, e as da Orde do 13 de xuño de 1990, sobre xestión de aceites usados, no se que refire ó réxime de control e seguimento previsto para os produtores e xestores.

e) Sen prexuízo do establecido no Regulamento CEE 259/1993, e das autorización que, se é o caso, sexan esixibles. os importadores e adquirentes intracomunitarios, así coma os axentes comerciais ou intermediarios que, en nome propio ou alleo, poñan residuos no mercado ou realicen con eles operacións xurídicas, que impliquen cambio de titularidade posesoria, aínda sen contido transaccional comercial (anexos XV e XVI).

Artigo 15º.-Contido da notificación.

1. A notificación, que se dirixirá ó director xeral de Calidade e Avaliación Ambiental, irá xunto coa seguinte documentación:

A. Para tódalas actividades:

a) Copia compulsada do código de identificación fiscal (CIF) da empresa ou, se é o caso, documento nacional de identidade (DNI) e número de identificación fiscal (NIF) do empresario individual.

b) En caso de persoa xurídica, deberase presentar copia da escritura de constitución ou modificación da sociedade, acreditada por calquera dos medios esixidos en dereito.

c) Poder notarial do representante legal da empresa.

d) Declaración das actividades de xestión ou produción que se van realizar.

e) Datos relativos ó centro ou centros de traballo onde se vaia realiza-la actividade: denominación, domicilio, municipio, provincia, teléfono e fax.

f) Declaración do tipo de residuo e cantidade anual que vai producir ou xestionar segundo o Catálogo Europeo de Residuos (CER) e o Real decreto 952/1997, do 20 de xullo, para o caso de residuos perigosos.

g) Declaración da zona de cobertura ou área territorial á que se circunscribe a actividade.

h) Destino dos residuos, constatado a través do certificado correspondente do xestor receptor.

B. Para a actividade de transporte:

Ademais da documentación requirida no punto 1.A deste mesmo artigo, presentarase a seguinte documentación:

1) Póliza de seguro da empresa transportista suficiente para cubri-los riscos da actividade. A póliza de seguro deberá cubri-lo risco de indemnización polos posibles danos causados a terceiras persoas ou ás súas cousas derivado do exercicio da actividade, así como os custos de reparación e recuperación do ambiente alterado.

2) Tarxeta de transporte.

Cando se trate de transporte de residuos perigosos incluírase:

a) Certificado de formación profesional segundo o modelo oficial (ADR) para cada conductor.

b) ADR do vehículo ou certificado de adecuación deste.

c) Seguro do vehículo que cubra os riscos de transporte de mercadorías perigosas.

2. A notificación presentarase nas oficinas da Dirección Xeral de Calidade e Avaliación Ambiental, ou nas delegacións provinciais da Consellería de Medio Ambiente, sen prexuízo da facultade que lles outorga ós particulares o artigo 38.4º da Lei 30/1992, do 26 de novembro, de réxime xurídico das administracións públicas e do procedemento administrativo común.

Artigo 16º.-Da modificación da actividade.

Calquera modificación ou ampliación da actividade suxeita a réxime de notificación deberá ser comunicada previamente á Dirección Xeral de Calidade e Avaliación Ambiental, que acordará a modificación ou ampliación de acordo coa documentación achegada conforme ó artigo anterior.

Capítulo IV

Das obrigas dos produtores e xestores

Artigo 17º.-Das obrigas dos produtores e xestores autorizados.

1. Produtores e xestores de residuos perigosos.

Deberán cumprir-las obrigas establecidas no Real decreto 833/1988, do 20 de xullo, no Real decreto 952/1997, do 20 de xuño, que modifica aquel, e na Lei 10/1998, do 21 de abril, de residuos, sen prexuízo doutras obrigas establecidas na lexislación vixente.

2. Xestores de residuos non perigosos.

Deberán cumprir-las obrigas establecidas na Lei 10/1998, do 21 de abril, de residuos, sen prexuízo doutras obrigas establecidas na lexislación vixente.

Ademais, os xestores que realicen actividades de valorización e eliminación de residuos non perigosos deberán presentar unha declaración anual das súas actividades no modelo que para tal efecto lles facilite a Dirección Xeral de Calidade e Avaliación Ambiental antes do día un de marzo do ano seguinte. Poderá presentarse en papel ou en soporte informático.

Artigo 18º.-Das obrigas dos produtores e xestores suxeitos a notificación.

A. Dos pequenos produtores:

Deberán cumprir-las obrigas ás que se refire o artigo 22 do Real decreto 833/1988, do 20 de xullo, e as establecidas na Lei 10/1998, sen prexuízo do cumprimento doutras obrigas establecidas na lexislación vixente.

B. Dos xestores:

Os titulares de actividades nas que se desenvolvan operacións de xestión de residuos non perigosos distintas da valorización ou eliminación, que non teñan a consideración de residuos urbanos ou municipais, e os transportistas de residuos perigosos que actúen como simples intermediarios por conta de terceiros, deberán cumprir-las obrigas impostas na Lei 10/1998, do 21 de abril, de residuos, sen prexuízo do cumprimento doutras obrigas establecidas na lexislación vixente.

Artigo 19º.-Incumprimento das obrigas dos produtores e xestores.

O incumprimento das obrigas impostas ós xestores e produtores poderá dar lugar á revogación da autorización ou á cancelación da inscrición no rexistro para as actividades suxeitas a notificación.

Capítulo V

Dos recursos

Artigo 20º.-Recursos.

Contra as resolucións do director xeral de Calidade e Avaliación Ambiental poderase interpor recurso de alzada ante o conselleiro de Medio Ambiente no prazo dun mes, de acordo co disposto na Lei 30/1992,

do 26 de novembro, de réxime xurídico das administracións públicas e do procedemento administrativo común.

Capítulo VI

Do rexistro

Artigo 21º.-Da creación do Rexistro Xeral de Produtores e Xestores de Residuos de Galicia.

Créase o Rexistro Xeral de Produtores e Xestores de Residuos de Galicia, que ten como finalidade a inscrición das persoas físicas e xurídicas que realicen as actividades de produción de residuos perigosos ou de xestión de residuos.

Artigo 22º.-Natureza do rexistro.

1. As inscricións do rexistro incorporaranse a un ficheiro automatizado (anexo XVII), que se axustará ó disposto na Lei orgánica 5/1992, do 29 de outubro, de regulación do tratamento automatizado dos datos de carácter persoal.

2. A responsabilidade do ficheiro recaerá na dirección xeral competente en materia de calidade e avaliación ambiental, ante a que o interesado exercerá os dereitos de acceso, rectificación ou cancelación cando se revele que os datos son inexactos ou incompletos, inadecuados ou excesivos, sen prexuízo da responsabilidade directa que na xestión dos datos lle corresponda ó empregado público que estea a cargo do ficheiro correspondente.

3. No suposto de cesión de datos ós servizos estatísticos das administracións públicas, terase en conta a normativa vixente da Comunidade Autónoma en materia estatística.

Artigo 23º.-Da inscrición no rexistro.

A Administración procederá a inscribir de oficio no rexistro ás persoas físicas ou xurídicas que realicen calquera das actividades de xestión de residuos ou produción de residuos perigosos.

Será preceptivo para proceder á inscrición obter a autorización administrativa previa para as actividades que se relacionan no artigo 4 e ter realizado a notificación en forma respecto das actividades que se citan no artigo 14º.

Artigo 24º.-Estructura do rexistro.

O Rexistro Xeral de Produtores e Xestores de Residuos de Galicia estrutúrase en dúas seccións, denominadas:

A. Sección I. Dos residuos perigosos.

B. Sección II. Dos residuos non perigosos.

Artigo 25º.-Sección I. Dos residuos perigosos.

Inscribíranse nesta sección as persoas físicas ou xurídicas titulares de instalacións ou actividades de produción e xestores de residuos que se consideren perigosos de acordo coa definición do artigo 2.C deste decreto, con independencia da súa orixe.

Nesta sección inscribíranse separadamente:

- a) Os titulares de industrias ou actividades productoras de residuos perigosos.
- b) Os titulares de industrias ou actividades xeradoras ou importadoras de produtos que polo seu uso poderán dar lugar a residuos perigosos.
- c) Os pequenos produtores de residuos perigosos.
- d) Os transportistas de residuos perigosos, cando no asuman a titularidade do residuo.
- e) Os xestores de residuos perigosos.
- f) Os titulares de talleres, estacións de engraxamento ou garaxes nos que se leven a cabo actuacións en relación cos aceites usados.

Artigo 26º.-Sección II. Dos residuos non perigosos.

Nesta sección inscribíranse separadamente as persoas físicas ou xurídicas que realicen actividades de xestión cos residuos seguintes:

1. Os residuos urbanos ou municipais, no Rexistro Xeral de Residuos Sólidos Urbanos creado pola Lei 10/1997, do 22 de agosto, de residuos sólidos urbanos de Galicia.
2. Os residuos sanitarios.
3. Os residuos industriais.
4. Os residuos agrarios.

Artigo 27º.-Do contido do rexistro.

As anotacións dos produtores e xestores que se practiquen no rexistro deberán reflectilo seguinte contido:

1. Código de identificación de produtor ou xestor que se lle asigne.
2. Datos acreditativos da súa identidade:
 - a) Nome ou razón social da persoa física ou xurídica inscrita.
 - b) NIF e DNI, se se trata de empresario individual, e CIF cando se trate de persoa xurídica.
 - c) Domicilio completo da empresa e do centro ou centros de traballo onde se realiza a actividade.
2. Actividades de produción ou de xestión que realiza.
3. Destino do residuo.
4. Tipo e identificación do residuo ou residuos que se van producir ou xestionar.
5. Capacidade nominal da actividade de produción ou de xestión, se é o caso.
6. Tipo de instalación e procedemento de produción ou de xestión.
7. Persoa encargada da actividade de produción ou de xestión.
8. Data da autorización e prazo desta, de se-lo caso.

9. Modalidade e contía da fianza, se é o caso.

10. Número e contía da póliza de responsabilidade civil, se é o caso.

11. Modificación ou ampliación da actividade suxeita a notificación.

Artigo 28º.-Do carácter da inscrición.

A inscrición no rexistro será obrigatoria para todas as persoas físicas ou xurídicas que realicen actividades de produción de residuos perigosos ou de xestión de residuos.

Artigo 29º.-Da cancelación e suspensión da inscrición no rexistro.

1. Son causas de cancelación da inscrición no rexistro:

- a) A suspensión definitiva da actividade ou da autorización, acordada por resolución motivada de acordo coa normativa vixente.
- b) A inhabilitación especial para profesión ou oficio acordada por sentenza firme.
- c) A clausura definitiva do local, establecemento ou industria.
- d) O cesamento da actividade.
- e) A caducidade ou revogación da autorización.
- f) O incumprimento sobrevido dos requisitos considerados necesarios para poder ser inscrito.
- g) O incumprimento das obrigas dos xestores suxeitos a notificación.

2. Son causas de suspensión da inscrición no rexistro:

- a) A suspensión temporal da actividade ou da autorización acordada por resolución motivada de acordo coa normativa vixente.
- b) A clausura temporal do local, establecemento ou industria.

Capítulo VII

Procedemento e potestade sancionadora

Artigo 30º.-Infraccións e sancións.

As infraccións cometidas contra o disposto neste decreto serán sancionadas de acordo coa Lei 10/1998, do 20 de abril, de residuos, e demais disposicións que lle sexan de aplicación.

Artigo 31º.-Procedemento.

O procedemento sancionador por incumprimento das obrigas establecidas neste decreto rexerá polo establecido na Lei 30/1992, do 26 de novembro, de réxime xurídico das administracións públicas e do procedemento administrativo común e polo Real decreto 1398/1993, do 4 de agosto, polo que se aproba o Regulamento do procedemento para o exercicio da potestade sancionadora.

Artigo 32º.-Competencia.

1. A incoación e instrucción dos procedementos sancionadores por calquera incumprimento do establecido neste decreto que constitúan infracción tipificada na Lei 10/1998, do 21 de abril, de residuos, Lei 10/1997, do 22 de agosto, de residuos sólidos urbanos de Galicia, e Lei 1/1995, do 2 de xaneiro, de protección ambiental de Galicia, será competencia do director xeral de Calidade e Avaliación Ambiental.

2. A resolución dos expedientes ós que se refire o parágrafo anterior corresponderalles:

- a) Nas infraccións leves ó director xeral de Calidade e Avaliación Ambiental.
- b) Nas infraccións graves ó conselleiro de Medio Ambiente.
- c) Nas infraccións moi graves ó Consello da Xunta de Galicia.

Disposicións adicionais

Primeira.-A Consellería de Medio Ambiente poderá eximir da esixencia de autorización administrativa de xestión de residuos non perigosos ás empresas ou establecementos que se ocupen da valorización ou da eliminación dos seus propios residuos nos centros de produción, sempre que a Xunta de Galicia dicte normas xerais sobre cada tipo de actividade, nas que se fixarán os tipos e as cantidades de residuos e as condicións nas que a actividade pode quedar dispensada da autorización.

En todo caso, as ditas actividades serán obxecto de inscrición no Rexistro Xeral de Residuos de Galicia.

Segunda.-Entrementres non sexa determinado pola lexislación estatal de desenvolvemento da Lei 10/1998, do 21 de abril, de residuos, as industrias ou actividades xeradoras ou importadoras de residuos perigosos ou de produtos do uso dos cales puidesen derivarse residuos perigosos, ós que non será de aplicación a necesidade de pedir autorización e demais obrigas ás que se refiren os artigos 7.1º, 9.1º e 22 da citada lei básica en función do volume de actividade, aplicaráselles esta exención ós pequenos produtores que se definen no artigo 22 do Real decreto 833/1988, do 20 de xullo. Tales produtores deberán solicitar en todo caso a inscrición con este carácter no rexistro que se crea por este decreto.

Terceira.-As actuacións administrativas que se deriven da aplicación deste decreto estarán sometidas ó aboamento das taxas previstas na normativa tributaria da Comunidade Autónoma.

Disposicións transitorias

Primeira.-As persoas físicas ou xurídicas ás que se lles concedese unha autorización para a reali-

zación de actividades de xestión de residuos non perigosos que non teñan a consideración de urbanos ou municipais, con posterioridade á entrada en vigor da Lei 10/1998, do 21 de abril, de residuos, e con anterioridade á entrada en vigor deste decreto, deberán adaptarse ós requisitos previstos neste decreto para a actividade de que se trate no prazo de tres meses.

O incumprimento das devanditas obrigas no prazo indicado poderá ser considerado como infracción administrativa, de conformidade co previsto na Lei 10/1998, do 21 de abril, de residuos.

Segunda.-Os xestores autorizados conforme o Decreto 260/1998, do 10 de setembro, polo que se regula a autorización de xestor de residuos sólidos urbanos e a inscrición no Rexistro Xeral de Xestores de Residuos Sólidos Urbanos de Galicia, deberán presenta-la declaración anual das súas actividades antes do día un de marzo do ano seguinte ó da autorización.

Terceira.-Nun prazo de seis meses contado desde a entrada en vigor deste decreto, a Administración, de oficio, adaptará os rexistros actuais de residuos ás esixencias do Rexistro Xeral de Produtores e Xestores de Galicia.

Disposición derogatoria

Única.-Á entrada en vigor deste decreto quedan derogadas as seguintes disposicións:

Decreto 260/1998, do 10 de setembro, polo que se regula a autorización de xestor de residuos sólidos urbanos e a inscrición no Rexistro Xeral de Residuos Sólidos Urbanos, coa excepción do artigo 3º, parágrafo 1, inciso final.

Decreto 263/1998, do 10 de setembro, polo que se regula a autorización e se crea o Rexistro de Produtores e Xestores de Residuos Perigosos, coa excepción do artigo 3º, parágrafo 1, inciso final.

Disposicións derradeiras

Primeira.-Autorízase o conselleiro de Medio Ambiente para dicta-las disposicións precisas para o desenvolvemento do decreto.

Segunda.-Este decreto entrará en vigor ós vinte días da súa publicación no Diario Oficial de Galicia.

Santiago de Compostela, sete de decembro de dous mil.

Manuel Fraga Iribarne
Presidente

José Carlos del Álamo Jiménez
Conselleiro de Medio Ambiente